

[Augsburg], 8. Juli 1556

An Johannes Oporinus

UB Basel, Fr. Gr. I 11, fol. 194r-195r.

Steinmann Nr. 688.

Abb.: Husner nach S. 148.

Lit.: Husner S. 149 (mit Auszug); Steinmann S. 48.

S. P. D. Vide quam sis homo fortunatus vel inuito Saturno. Scriptis iam et obsignatis prioribus literis duae se praeter expectationem meam obtulerunt occasiones rei nostrae bene gerendae, non certae illae quidem, sed tamen cum spe bona. Is qui stipendijs Fuggeranis praeest, alia de causa me conuenit. Rogauit hominem num breui aliquod stipendum medicum vocaturum esset. respondit, se non quidem certò scire, sed intra duos menses omnino expectare, idque mihi indicaturum statim, et domino meo in primis. Is enim id mandauit. Quod si contigerit, Theodori nostri non ero immemor. Si non contigerit, fortunae me non minus quam vos deludenti veniam dabitis. Verùm ne sis nescius, tenuia sunt illa stipendia et ad scholas germanicas supputata. Sed si eo vsque ventum fuerit, εύρήσομεν σοφὰ φάρμακα, binis annis in vnum contractis. Legendas exhibui domino Theodori literas, probat ingenium et stylum. principia bene se habent. Deinde cum officij causa (ne me forte παρασιτεῖν putas) ad D. Antonium Fuggerum caenatum venisse, rogauit me senex humanissimus vt procederet opus nostrum? Respondi id quod res est me spem habere Zonarae intra mensem hunc absoluendi, et, si eius voluntas ferret, paratum nos habere typographum, vltro suam operam pollicentem. Quid multis? Post longam disputationem a SPQR κεφαλαιωδῶς haec decreta sunt, vt ex te cognoscerem.

1. quantum pecuniae mutuae suppeditari tibi velles, et quando eam sine vlla tergiuersitatione operis nondum distracti, aut aliorum incommodorum conquestione certò reddere possis et velis.

2. quot exemplaria imprimere velis?

Haec vbi ex te cognita fuerint (quod fieri quamprimum, tua quoque interest) postulabitur a te, si inter nos conuenerit, vt

1. charta vtaris iustae magnitudinis, cuiusmodi est Nicephori, pura et candida, et quae non perfluat.

2. vt ipse sis et graeci et latini codicis corrector accuratiss[imus].

3. vt litera et graeca et latina vtaris grabdiuscula et inter sese respondentē.

4. vt opus primo quoque tempore absoluas.

καὶ ταῦτα μὲν ἡ βουλὴ καὶ ὁ δῆμος τῶν ῥωμαίων.

Audi iam, si placet, Lupi tribuni plebis non intercessionem, sed consilium, vel propotius opinionem.

Censet igitur Lopus, te D. Carini opera posse ducentos Horinos non mutuae, sed gratuitae pecuniae impetrare, eosque tibi fore vtiliores, quam 400 mutuae.

Vides enim καὶ τοὺς μεγιστᾶνας κατὰ τὴν προθεσμίαν ἀπαιτεῖν τὰ δεδανεισμένα καὶ ἀγανακτεῖν μὴ εὐθὺς ἀπολαβόντας. Sed si δωρεὰν obtainere non poterimus, δάνειον vtrique κατὰ τὸ δεύτερον πλοῦν accipiemus.

Deinde quia graecolatinus codex a tenuiorib[us] non facile comparabitur, quid si conuersionem duntaxat, charactere minuto forma 16^{ta} impresseris? Sic enim totus Zonaras tres iustus tomos conficiet, ac tu Lugdunensibus eum bolum praeripueris. Opus vendibile fore spero, 1 quod autor paucis visus est, 2 quod opus est historicum, et eas historias continet, quae

si absque hoc fuissest, planè intercidissent. Quantum enim huic Volaterranus et Cuspinianus alijque debeat, ipsa docebit collatio. 3. Stylus etsi inaequalis est, tamen ferè vbique est tolerabilis, saepe etiam bonus. Sed euentum e fortuna pendere potius, quam a librorum bonitate nosti. Quare tui consilij est, quid e re tua fore censeas.

Si hanc aleam iacere libet, per me non stabit quo minus a proximis nundinis auspiceris. et interea chartam compares et videas, ne qua res te remoretur. Sed prius deliberandum erit, vtrum commodius sit graeca a latinis separare, an coniungere? Si coniungere, vtrum integris folijs e regione respondentibus (sicuti adhuc nobis consultum videtur, nisi tu aliud censueris) an disiunctis columnis? Puto D. Antonium in tuam sententiam iturum quicquid censueris, modò Zonaras graecè et latinè vnà edatur. Interim peto, vt cum proximo tabellario specimen nobis mittas et chartae si potes, et characterum quibus vsurus es in vno integro aut dimidiato folio. ita vt graeca laeuum, latina dextrum latus occupent, vt in Isocrate factum est. Et haec de Zonara. De Chalcocondyle Camerarius nuper haec ad me scripsit. Ediderunt Laonicum versum. Ego rectum malim. Nam mihi istic scriptum illud insipienti, oratio sat bona visa est. Si poteris operam nauare, vt graeca quoque edantur, velim facias. haec ille. Ego verò nihil suadeo, εἰδώς ὅτι δεῖ χρημάτων, καὶ ἄνευ τούτων οὐδὲν ἔστι γενέσθαι τῶν δεόντων. sed tantum expono quid desiderent docti, qui pecuniam suppeditare non possunt. Vale et cum D. Carino de rebus omnibus quamprimum deliberato, qui vnus tuis rationibus omnium optimè consulet, sicut et meis consuluit. διὰ γὰρ τῆς ἐκείνου σπουδῆς ὁ λύκος κεχρυσώσεται, ἀν ὁ Πλούτων ἔθελήσῃ. Iterum vale. 8 Iulij. 1556. intempesta nocte, cum tota familia dormiente, ego vnus dormiturirem.

Hiero[nymus] Wolfius.